

# La Cjase dai Arcivescui

Anna Bombig

*Volentieri pubblichiamo in friulano un testo della maestra Anna Bombig che illustra le caratteristiche del palazzo Cobenzl, sede dell'arcivescovado nel 250° di fondazione dell'Arcidiocesi.*

(red.)

L'edifici edificât dal 1500, al puarte sul archivolt dal puartâl interno il non dal ultim proprietari Agostino de Codelli. In timp de vuere mondiâl al vignî sdrumât in buine part e tirât sù dal guviâr talian risprietant il modêl originari. Un tant al ven ricuardât intune sale dulà ch'al comparîs il non dal re Vittorio Emanuele III. Al è par merit però dal baron Codelli, om di grande pietât, se il palaç al diventâ la cjase dai arcivescui. Par chist so regâl, al vignî alçât di grât tal 1749 cul titul di baron dal Sacri Imperi Roman cul predicât di Fahnenfeld. Opere sô, aneje la costruzion de preseose capele in stîl rococò dedicate ae Esaltazion de Sante Crôs che si puès mirâ sul imponent altâr di marmul preseât dominât de sta-

tue dal Redentôr circondât, a sô volte, dai trê simbui teologai: Fede, Sperance e Caretât. Di ca e di là de Crôs, doi personaçs, forsit



*Il palaç Cobenzl dal 1751 cjase dai arcivescui di Guriza.*



*Il cortil interno dopo dai lavôrs di ristauvo.*

l'imperadôr e il re persians Eraclio e Còsroe ch'a vevin vût da fâ cu la regjine Eline, mari di Costantin. Denant dal altâr, la tombe dal benemerit Codelli e sui mûrs cuadris di Sants. Intal curtîf interno un biel poç dal timp dai Cobenzl; superât il maiestôs scjalon d'onôr, si rive inte loze plene di lusôr logade inte part nobile dal palaç splendidamentri ornât cui mobii di palaç Strassolt-Vilagnove vûts in regâl cui quadris de parintât, de ultime erede de Cjase, la contesse Edith di Strassolt.

Di grant atrât la galarie di ritrats simpri de famee Strassolt ram di Vilagnove e, inte sale dal Consei, la serie di princips arcivescui esponûts tor a tor des parêts a scomençâ dal Attems par finî cul arcivescui emerit Pari Antonio Bommarco. In ducj, 15 di lôr sence però chel di mons. Dino De Antoni, gnûf di nomine za ben instradât viars la tutele des lenghis minoritariis. Ogni pastôr al si ere

distint par alc ch'al veve curât in mût particolâr. Dal sigûr, une grande storie se dal '700 in ca a si son alternâts princips di etnie todesce, slovene, taliane e furlane. Un intercalâsi ch'al veve puartât dome che ben in cjamp pastorâl e ch'è veve favorît une convivençe pacjifiche tra lis popolazions. Si ricuarde dal Attems lis sôs predicjions tes lenghis dal popul, duncje ancje par furlan, e la sô visite pastorâl in

caroce durade mê s e mê s par cognossi ducj i fedêi fintremai a rivâ su lis rivis dal flum Gail ch'al segnave, a tramontan, il confin de Arcidiocesi di Guriza. Il secont al ere stât il cont Rodolfo Edling che, par jessisi diclarât contrari al pensâ dal imperadôr Josef II, al rinunciâ ae sô incarghe. Dopo di lui, il cont Francesc Filip Inzaghi ancje se par une di sole arcivescui di Gardisceje imperiâl daspò la sopression de Arcidiocesi di Guriza par man dal sovrân inluminist. Il prin a bêtisi par introdusi inte liturgjie lis lenghis dal popul, furlan e sloven, al fo il "carniolus" Josef Walland, un pastôr ch'al veve viodût unevore lontan e, partant, ritegnût un precursor dai nestrîs tîmps stant che il so sium al è diventât une realtât cul jessi burîf fûr propri tal zenâr dal 2001 il Lezionari in lenghe furlane. Un bon ricuart al lassà ancje Francesc Saveri Luschin, carinzian, ch'al veve vût simpri un contegno dignitôs di grant siôr. A lui il merit di vê curât il Seminari teologjic di fondazion teresiane. Daûr di lui, mons. Andree Gollmayr ch'al fasè sù il Seminari minôr clamât in so onôr, "Andreanum" e



*La sale di riceviment tal plan nobil.*

podopo mons. Luîs Matîe Zorn che, lant daûr dal predecessôr, al fondà l'Istitût di San Luîs: une mane pe ziventût. Ma tra i tancj, si conte ancje un cardinâl, Jacun Missia stirian di nassite, ch'al celebrà l'an gjubilâr dal 1900 e in chê ocasion al fasè tirâ sù une gnove capele private dedicate a San Salvadôr, tant plui comude de prime, par cjatâsile dongie l'apartament.

Mons. Andree Jordan sloven, al si ere distint pe sô spicade bontât. Mons. Francesc Borgja Sedej invect, di riunde slovene, nol vê par nuie une vite facil in timp dal regjime fassist difati, al fo costrêr a rinunciâ al so ministeri. Eco alore, il prin pastôr italian cun mons. Carli Margotti. A lui il merit di vê finide la glesie dal Sacri Cûr indulà



Il cont Riccardo Strassoldo.



La sale dai conseis cui ritrats dai arcivescui.

ch'al ripose intune tombe di mar- mul scolpide dal gardiscejan G.B. Novelli. Ancje lui sul finî de II vuere mondiâl, fat presonîr dal comant di ocupazion titine, al passà moments di grande passion. Passât il temporâl de vuere e calmâts i anims, sô prime preocupazion e fo chê di impiâ la pâs e di tirâ sù lis condizions disastrosis de citât daspò cinc ains di stents. Ae sô muart al vignî nomenât il triestin Pari Gjacint Ambrosi, frari capucin che in dute umiltât al rinunciâ al titul di princip ereditât in consequence dal diplome dal 2 di mai 1766 consegnât da Maria Teresia al prin arcivescul e a ducj i sucessôrs. Dopo di lui al vignî il talian Andree Pangrazio clamât, in curt a Rome par une incarghe unevore impuartant. Il sucessôr, mai dismenteât mons. Pieri Cocolin, al fo il prin arcivescul furlan e propri lui, ai 12 di lui dal 1970, al dè il permès al

plevan di Aquilee di celebrâ la Messe grande pe fieste dai Sants Ermacure e Furtunât, in lenghe furlane. L'an dopo al fo lui stes a concelebrâ, simpri in furlan e a tignî la predicje inte varietât di Guriza. Il prin pas, il plui impuartant, al ere fat e, d'inchevolte, pe sagre dal Patriarcjât si pree e si cjante inte Glesie Mari par todesc, sloven e furlan come intai secui passâts. Grant ancje il so interès pes Missions de Afriche e al si preocupà par meiorâ la citât di Popon e di Grau. Dopo di lui, un altri frari talian, cheste volte di Cherso in Istrie, Pari Antoni Vitale Bommarco che, sin de sô prime jentrade in diocesi, al butà il voli soredu su di Aquilee par conservâle e custodîle miôr. Il so gran merit al è però chel di vê inmaniât tal 1996 il II sinodo diocesan de storie gurizane ch'al à spissulât un flum di graziis in favôr de nestre int.